

Köttōpar ko an katak in:

- Kwaļok bwe Anij e jab meļokļok kallimur ko An.
- Kwaļok bwe Anij e kajoor jān Jetan im aolep.
- Kwaļok bwe armej rej aikuj tōmak Anij bwe ren kabuñburuon.
- Kwaļok bwe enaaj tōprak plan im pepe ko an Anij.

Meļeļe ko reļap ilo katak in:

- Jen lo bwe Anij e kajoor jān aolep.
- Jen lo bwe Anij e kōṅnaan bwe en wor iaļ in lōmōṛ ṅan armej.
- Jen lo bwe Anij ej lōmōṛen ro me rej tōmak E.

1. Anij ear kallimur kōn juon Ri Lōmōṛ.

Ke eṃōj an Adam im Iv jerōwiwi, raar jepel jān Anij. Bōtab Anij ear letok juon Kallimur kōn Ri Lōmōṛ eo.



Jenesis 3:15 Im Inaaj likūt kōjdat ikōtaam im kōrā eo, im ikōtaan ineem im ineen. Enaaj kōkkure bōram a kwō naaj kōkkure jimwin neen.

Anij ear kallimur bwe Ri Lōmōṛ in enaaj bōk anjō ioon Jetan kōn An eñtaan ilo juon wāween. Ilo iien an Anij kwaļok kallimur in, ear kōnono ṅan wōn? Ear kōnono ṅan Jetan. Eoon in ej ba, “Enaaj kōkkure bōram.” Jetan e jeļā bwe juon raan enaaj jorrān. E jeļā bwe juon raan enaaj waļok juon Ri Lōmōṛ, im Ri Lōmōṛ in enaaj jumae e.

Ilo ṃool Ri Lōmōṛ in enaaj anjō ioon Jetan im ṃan e! Kōn an Jetan roñ naan kein an Jeova Anij ilo Jenesis 3:15, ej barāinwōt jeļā bwe Ri Lōmōṛ in ej ineen kōrā. Iv ear kōrā eo wōt ilo tōr eo. Kōn men in, Jetan ear kile bwe Ri Lōmōṛ eo enaaj waļok jān bwijin kōrā in.

Ilo Jenesis 3 je lo bwe Iv ear keotak ruo ļaddik: Kein im Ebel. Jetan e jeļā bwe Ri Lōmōṛ eo Enaaj pād ilo bwijin juon iaan ļōmarein. Ekwe, kwō ļak lale, Jijej Kūraij enaaj waļok jān bwijin wōn? Kein ke Ebel? Jej lo bwe eṃṃan Kein ippān Jetan kōnke ear jab tōmak Anij. E alikkar bwe Ri Lōmōṛ eo enaaj waļok jān bwijin Ebel kōnke e ri tōmak. Jetan ear likūt ilo būruon Kein bwe en ṃan Ebel.



1 Jon 3:12 Jab āinwōt Kein ej an Ri Nana eo im ar urōte jatin. Im ewi unin an urōte? Bwe jeral ko an re nana, im ko an jatin re wānōk.

Bōlen Jetan ear ļōmṃak bwe eļāñne ear mej Ebel innām e ban kar waļok Ri Lōmōṛ eo. Bwe? Kōnke eļāñne ear mej Ebel, innām enaaj kar jako bwij an ro ri tōmak. Eļāñne ear jako Ebel innām aolep armej jān iien eo im etal re naaj kar waļok jān bwijin Kein. Eban kar waļok Ri Lōmōṛ eo ekkar ṅan kanniōk. Jetan ear ļōmṃak bwe ear maroñ jumae Anij. Ear ļōmṃak bwe ear maroñ bōbrae kallimur eo an Anij jān an waļok. Bōtab ejjeļok e maroñ jumae Anij. Ejjeļok e maroñ bōbrae pepe ko an.



Aiseia 45:9 Wo [jorrāān] ñan eo ej akwāāl e eo Ri Kōmanman!

Jen barāinwōt lale:



Jabōn Kōnnaan 21:30 Ejjelōk mālōtlōt ak jelāļokjeñ ak pepe ñae Jeova.

Kwō lo ke? Ejjelōk e maroñ jumae Anij. Jetan e kajoor jān aolep timon ro jet. Jetan e kajoor jān aolep men in kōmanman ko ilo laļ in. Bōtab e jab maroñ anjo ioon Anij. E jab maroñ bōbrae im kabōjrak pepe ko An.

2. Ri Lomōor eo ear waļok jān bwij an ro ri tōmak.

Ilo ad katak Baibōl jej lo juon bwij an ro ri tōmak. Jijej ear waļok jān bwij in ekkar ñan kanniōk. Jān jinoin laļ in Jetan ear kajjioñ kōkkure bwij in bwe en jab waļok Ri Lomōor eo. Menmenbwij an ro ri tōmak ej pād ilo Matu 1:1-16 im bar Luk 3:23-38.

A kiiō juon kajjitōk. Ewi wāween bwe en wōnmaanļok bwij eo an ro ri tōmak? Emōj an jemļok ippān Ebel. Ebel ear mej mokta jān an wor nejin. Kein ear man e. Ewi wāween bwe menmenbwij eo an Jijej en etal? Ekwe, uwaak eo e pād ilo Genesis 4:25.



Genesis 4:25 Im Adam ear bar jelā lio pālen, im ear keotak nejin emmaan, im naetan Seth; bwe, ej ba, “Anij ear likūt bar juon ineeō bwe en pinej jenkwan Ebel, eo Kein ear man e.”

Meñe Jetan ear man Ebel bwe en jako bwijin ro ri tōmak, Anij ear kajutak Seth. Ejjelōk kajoor e maroñ ukōt kallimur ko an Anij. Jerbal ko an Jetan re jāmin tōprak.

Seth ear juon ri jerōwiwi āinwōt jemān im jinen ke? Aet, bwe aolep armej rej ri jerōwiwi (Rom 3:23). Ear juon ri jerōwiwi āinwōt Ebel. Bōtab kōn an lōke kallimur eo kōn Ri Lomōor eo, im jab jermal ko an make, Anij Ear watōk an tōmak āinwōt wānōk. Bōtab Anij ear ba bwe oņean jerōwiwi mej! Aet, ak mej an Jijej ear pinej jenkwan mej an Seth. Jijej ear mej im kōllā oņean nana ko an Seth, im kōn men in, Anij ear maroñ in watōk an tōmak āinwōt wānōk.

3. Armej raar jino aer kūr etan Jeova



Genesis 4:26 Im ñan Seth, juon nejin emmaan ear barāinwōt ļotak ñan e; im ear likūt etan Inosh. Innām armej raar jino aer kūr etan Jeova.

Etke eoon in ej ba bwe armej raar jino aer kūr etan Jeova. Meļeļein raar kabuñ ñan Jeova. Ta Adam im Iv raar jab kūr etan Jeova ke? Ta Kein im Ebel raar jab katok im kabuñ ñan Jeova ke? Aet, ejjelōk kajjitōk bwe aolep armej rein raar kabuñ ñan Jeova. Innām etke eoon in ej ba bwe an armej kūr etan Jeova ear jino ippān Inosh?

Baibōl ej jiroñ kōj bwe e ļak waļok jerōwiwi innām e lukkuun mōkaj an ererak. E jab to im jerōwiwi ear mōñāñe. Kein ear ilok jān imaan mejān Anij. Ro nejin raar timon im orļok. Eoon in ej katakin kōj bwe jejjo wōt year re moot ļok innām ear jako ļok an armej kabuñ ñan Anij. Eoon in ej kaṃool naan

ko an ri jelōk Paul ilo Rom 3:11:



Ejjeļok juon e jeļā; ejjeļok juon ej kapukot Anij.

Armej ro re ļak jepel jān Anij innām rej wan laļļok wōt. Meļeļein āt in Inosh ej jerata, eñtaan, mōjņo, ak juon men e pidodo. Kōj ri jerata. Kōj ri ban. Jej jeļā wōt jebwābwe. Anij wōt e maroņ jipaņ kōj.

Eoon in ej kwaļok bwe ilo iien an Inosh ļotak, elōñ raar jino aer kūr ñan Jeova. Raar jino aer kile bwe Anij wōt e maroņ jipaņ er. Eñin meļeļe in naan in lōke. Eļañņe kwōj tōmak bwe kwōj aikuj jermal ñan Anij bwe kwōn tōpar aelōñ eo an, innām kwō jab lōke. Ñe kwōj lōke juon men, innām kwōj atartar ioon 100%. Kwōj ke atartar wōt ioon bōtōktōken Jijej ñan kawānōk yuk?

Meņe armej raar kōņaan ilok wōt jān Anij, Ear pukot wōt er. Ear jilkinļok ñan er elōñ armej bwe ren kwaļok ñan er kōn E. Ri jelōk rein raar kakememej armej kōn ruo men.

(1) Oņean Jerōwiwi Mej.

Anij Ear jiroņ Adam im Iv bwe ren jab mōñā leen wōjke in jeļā eņman im nana. Jeova ear ba bwe ilo raan in aer mōñā renaaj mej otem mej. Kōn an Adam im Iv kālōt jerōwiwi, raar jepel jān Anij. Renaaj mej otem mej. Ejjeļok aer kōjatdikdik.



(2) Anij ear kallimur kōn Juon Ri Lomōor.



Ejjeļok juon men im Adam im Iv re maroņ kōmmane bwe ren mour im wānōk imaan mejān Anij. Ejjeļok juon men im je maroņ kōmmane ilo raan kein bwe jen wānōk. Eļañņe Anij ejab tūriaņo kake kōj innām jenaaj mej. Anij ear tūriaņo kake ro ri laļ in. Ear kallimur kōn juon Ri Kapit eo me enaaj juur bōran Jetan. Eļañņe armej rej tōmak ilo Ri Kapit in renaaj mour indeeo.

Er kein men ko ro im eļap an ri kanaan ro an Anij kakememej armej ro kake. Kiiō jen katak kōn juon iaan ri kanaan rein. Jen katak kōn Inōk.

4. Anij ear kapeke Inōk.

Ilo tōre ko an ri etto ro e kar ejjeļok aer Jeje ko re Kwōjarjar. E jañin kar dede ļok Baibōl. Elmān an kar ri etto ro jeļā kōn Jijej? Elmān aer kar jeļā kōn ankilaan Anij ñan er? Ewi wāween aer maroņ jeļā kōn men ko an Anij?

Anij ear yokwe armej rein im Ear kōņaan bwe ren jeļā kōn jouj eo An. Ear kōņaan bwe ren jeļā kōn plan eo An ñan lomōoren armej. Ear kōņaan barāinwōt kakkōl er kōn mej. Ilo iien etto Anij ear kōnono ñan armej ilo elōñ wāween.

Mokta, Baibōl ej ba bwe men ko im Anij ear kōmanmani, raar kōnono kōn E.



Sam 19:1 Laņ ko rej kōņaan kōn aiboojoj an Anij, im mejatoto ej kwaļok jermal in Pein.

Ruo, Anij ear jiroņ aolep ri tōmak bwe ren katok kōn laam. Manit rōt in ear kakememej er kōn ta? Bwe armej rej ri jerōwiwi, im ekkar bwe ren mej; kab enaaj wor juon Ri Lomōor me Enaaj mej ilo jikōd im

kōllā oņean jerōwiwi ko an armej.

Anij ear kapeke Inōk bwe En ito-itak im kwaļok kōn E. Anij ear kōņaan bwe armej otemjej ren oktak jān jerōwiwi ko aer im lōke E.

5. Inōk ear juon ri kwaļok kōn Jijej.



Jude 14-16 Im barāinwōt Inōk, armej kein kajiljilimjuon jān Adam, ear rūkaanij im ba, “Lo, Irooj ear itok ippān joñoul toujin ko An re kwōjarjar, bwe En kōmman ekajet ñan ro otemjej, im ña ruōn ro ri nana otemjej, kōn jermal nana otemjej aer raar kōmmanmani ilo nana, im kōn men ko otemjej re pen ri jerōwiwi re nana raar kōnono ñae E kaki.”



Meñe Inōk ear mour 3000 jima year mokta jān an kar Jijej itok ñan laļ in, Ear jeļā kōn Jijej. Bwe? Kōnke emōj an Anij kallimur kake ilo Genesis 3:15. Inōk ear barāinwōt jeļā kōn an Jijej itok alen kein ka ruo. Men ko im Inōk ear rūkaanij kaki rej waļok ilo Revelesōn 19:11-16.

Ri etto ro raar jeļā kōn naaj ekajet eo an Anij. Raar jeļā kōn naaj jemļoken laļ in. E lukkuun aorōk naan in na ruōn. Elōñ armej ilo raan kein rej jab watōk er ri nana. Bōtab Anij enaaj ña ruōn aolep ro me re jañin lōke Jijej.

6. Inōk ear juon waan joñak kōn jerkakpeje.



Jenesis 5:24 Im Inōk ear etetal ippān Anij, im e jako, bwe Anij ear bōk e.

Eļap an Anij kar kajermal waan joñak ilo Kallimur Mokta ñan katakin armej. Unin An kōmman āindein ej kōnke ejjeļok an armej make Baibōl. Jān Adam liktak ñan Inōk aolep armej raar mej. Meñe emōj an Anij kallimur kōn Ri Kapit eo (Ri Lomōor eo, Ineen Kōrā eo), armej raar lo wōt bwe raar mej. Anij ear kōņaan kakememey er kōn kallimur eo An kōn lomōor (kōn mour indeeo). E ļak jako Inōk innām armej raar jeļā bwe ear jab mej. Raar jeļā bwe ear jab pād ilo lōb. Raar jeļā bwe Anij ear bōk e. Innām Ear bōkļok e ñan ia? Ñan Ippān. Ñan lañ.

Kōn waan joñak in emman, armej raar kile bwe ro ri tōmak re naaj mour indeeo ilañ ippān Anij. Re ban mej indeeo, ak re naaj bōk anjo ion jerōwiwi im mej.



Hibru 11:5 Kōn tōmak emōj bōklōñļok Inōk bwe en jab mej, im raar jab loe bwe Anij ear bōk lōñ ļok e; bwe mokta jān an wanlōñļok ar kōnnaan kōn e bwe ear kabuñ būruon Anij.

Bōlen elōñ re maroñ kōnono eoon in im ba, “Lale mōk, unin an Anij bōk Inōk ej kōnke Inōk ear kabuñ būruon Anij. Ej meļeļe in bwe ear kōmman jermal ko remman.” E jimwe ke men in? E jab. Ejjeļok armej enaaj erreo jān jerōwiwi ko an im bōk mour indeeo kōn jermal ko an ak an make tiljek. Ilo mool elmān an juon armej kabuñ būruon Anij?



Hibru 11:6 Im eļaññe ejjeļok tōmak, armej re ban kabuñ būruon; bwe eo ej itok ñan Anij, emman en tōmak kōn an Anij pād, im kōn An letok jinōkjeej ñan ro rej kapukot E.

Eoon in ej ba bwe juon wōt men enaaj kabuñ būruon Anij. Ewi men eo? E jimwe! Tōmak. Inōk ear tōmak Anij, im Anij ear lōmōḡren e kōn an tōmak. Anij ear bōk Inōk bwe En kwaḡok ñan ro jet bwe ewor juon jikin eḡḡan ilañ, im ro jet me rej tōmak Anij re naaj bar āinwōt etal ñan Ippān.

Kajjitōk ko:

1. Jisōs, Ri Lōmōḡ eo, Ear itok jān bwij an wōn?
2. Etan nejin Adam im Iv me ear ḡotak ke e mej Ebel?
3. Ri kanaan ro raar kakememej armej kōn ta?
4. Inōk ear kōnono ippān armej kōn ta?
5. Ke Anij ear bōk Inōk, im ear jab mej, men in ear juon waan joñak kōn ta?